

PEPPE SOZU - MÀRIEDDU MÀSALA

Festa de Santa Maria

ILBONO, SU 3 DE TRIULAS DE SU 1984



DOMUS DE JANAS

ESÓRDIU

1. Sozu (1'23'')

Ormai in s'avantzada edade mia
non so seguru 'e sa merce chi dono:
a sas garas no chelzo narrer nono,
mi giotro cun apena 'e fantasia.
E da chi permitidu mi at Maria
a che torrare a cantare a Ilbono
ringratziende s'eterna Signora
unu saludu a bois nd''ato ancora.

2. Màsala (59'')

Ilbono, de ocupare mi cuntento
sa cadrea ch'in palcu mi preparas.
Inoghe ch'apo fatu tantas garas
chi nemmancu su nùmeru mi ammento:
mi ses una 'e sas biddas pius caras
no est a nou chi mi nde presento
cun frutos de un'ómine 'e virtude
e permiti chi ancora ti salude.

3. Sozu (1'13'')

In custu arroventadu caldu istiu
poi de un'ijerru prolungadu
su tempus d'improvisu at cambiadu,
totu nos est lassende sena briu
ma a sa gara li damos s'aviu
comente est dogni 'olta capitadu
ch'allegrat s'ambiente e-i sa zona
isperende 'e che fagher festa 'ona.

4. Màsala (53'')

Cummemorende 'e chelu sa padrona
inoghe semus a fiancu 'e pare.

Ch'at zente meda pro nos iscultare,
de Ilbono e de 'iddas de sa zona
e isperamos in bene 'e passare
custa note chi paret finas bona.

E no podimos dare menzus dote
si nos bessit sa gara che-i sa note.

5. Sozu (1'05'')

Tzeltu chi una gara 'e poesia
nisciunu podet dare garantida
comente nos sutzedit in sa vida
in sos tribaglios de ogni zenia
ma de sas grascias s'eterna Maria
a nois at a fagher de guida:
si sutzedit calchi momentu istranu
nos diat issa unu colpu 'e manu.

6. Màsala (46'')

Sa festa est sempre in custa data fissa,
sa chi faghet Ilbono pro usàntzia.

Tando Maria si bi pensat issa
ja l'invocamos cun vera costàntzia
ca deo so nemigu 'e sa promissa
però so semp' amigu 'e s'isperàntzia.

E gai chelzo fagher custu sero:
nudda promito però meda ispero.

7. Sozu (1'00'')

Mi parit chi as mesu idea avara
ca si no as sa linia faddidu.

Comente ti cumportas tando nara
si a inoghe che ses arrividu

e cando mai no as promitidu
inoghe de che faàghere una gara?

E una gara tocat de la fàghere
po poder custa zente soddisfàghere.

8. Màsala (50'')

Promissu apo de ch'enner che poeta
ma dogni àtera promissa est vana.

Celtu no podet bessire perfeta,
podet bessire finas mediana

e si no mediana 'essit discreta,
si no discreta ja essit metzana

cando semus in palcu unu a dogn'ala
però non nd'amos fatu mai mala.

9. Sozu (55'')

Dae trint'annos innanti de oe
custos t'ana connotu a criadura:

Tando fis allievu e no eroe,
no nde faghias bolos in altura.

Como chi annos nde as barantanoe
pon'in campu su donu 'e sa natura

si no ses a sa crítica suggetu
ca debes esser maduru e cumpletu.

10. Màsala (49'')

Est abberu chi sempre m'an intesu
inanti 'e su presente in su passadu
e ispero de aer sempre resu
a su mancu su tantu chi mi an dadu.
E ocannu nos an bene acopiadu,
guasi amos su matessi pesu
e finas sa matessi calidade
po chi b'epat diferentza in s'edade.

11. Sozu (54'')

Ormai acuistadu lu at su sinnu:
ses obligadu, Màrio, chi cantes.
Che rassu ses in mesu 'e sos pesantes
e-i sa conca at cambiadu intinnu:
oramai no ses pius pitzinnu
e no ti nd'an a dare atenuantes
e ses mastru e poeta ti crêne,
como ses obligadu a cantar''ene.

12. Màsala (50'')

Est a cantare una fadiga immensa
chi dogni 'olta matana bi leo
e cando bi matano bi peleo
ma custas averténtzias mi senza
e tue pro sa parte tua pensa
chi pro sa mia ja bi penso deo
send'in Ilbono umpar'in custa die
ca aggiumai so mannu cant'a tie.

13. Sozu (1'04'')

Ormai chi ses mannu e campione
sa fortza ch'as in campu pone tota.
S'òpera mia in dogni zona est nota
si fia eo archibbusu o cannone
e-i com'eo devo fagher lota
e so timinde sa retrocessione.
Devo tentare 'e mi tènnere in pannos
ormai cun sos mios setant'annos.

14. Màsala (42'')

Mi paret chi mi ponzo in visiera
ca mi nde fia mesu ismentigadu
ma si a-i custu palcu so pigadu
sa prima 'ia no est istasera:
trintatres annos apo 'e carriera
e so vintichimb'annos cojuadu,
de vintibator annos apo fizos
e tue in chilca 'e mi dare consizos.

15. Sozu (1'03'')

Ma ecco sos errores ue sunu
nende chi unu est babbu 'e fizos
e-i sos àteros li dana fastizos,
su bonusensu no b'est a radunu.
Ma deo penso bisonzu 'e consizos
in custa vida nde tenet dognumu
che sa 'etza ch'a morrer no sentiat
cantu ancora imparare cheriat.

16. Màsala (44'')

Mi tocat chi s'edade la respete
ca gentilesa puru in te bi noto.
Ma cando fato totu su chi potu
ite pretendes chi àteru fete?
S'otada metricada tesso in oto,
no mi che nd'essit de noe o de sete
cun-d-unu versu a s'àteru istrintu
e no mi chelzo tiradu e ne ispintu.

17. Sozu (58'')

Deo repito s'iscena 'e issara
che cando sia inoghe babbu o frade
ca s'impignu po fagher una gara
est oramai una netzessidade.
Ammenta chi sa popolaridade
la devimos pagare como cara:
si su nomen sa zente dêt gradire
calchi cosa da conca at a bessire.

18. Màsala (47'')

Ma si pensamos a tempos de deris
no mi est capitadu a sa sola
in su paese meu e furisteris
da poi fata unu pagu 'e iscola:
s'est comintzadu dae sos tzilleris
e dae su tusolzu e da s'alzola
a cantare cun vera passione
ma como semus de professione.

19. Sozu (1'02'')

Ma oriolu, bória e chimentu
ponet s'intera 'idda in bonumore.
Boddinde in su giardinu ogni fiore
raggiungher lu devimos un'intentu:
nâmos si at preparadu s'argumentu
su comitadu organizadore,
gai in su tema sou ognunu gherrat
e-i cun custa s'esórdiu si serrat.

20. Màsala (40'')

Inoghe non so deo chi cumando,
siat fata sa volontade issoro.
Ubbido semper e nudda domando
ca so istadu sempre 'e bonu coro
e pro chi no so naschidu in Logudoro
isco inube passare e a ub'ando.
E mai de s'anzenu m'impadrono
siat in aterue o in Ilbono.

TEMA I: ISCÉNTZIA MÉDICA - ISCÉNTZIA MECÀNICA

1. Sozu (1'16'')

Sena abbusare 'e sa 'ostra passéntzia dae nou in su palcu so fichidu da chi cust'argumentu an ditzididu mastros de una tzerta cumpeténtzia. Su primu tema in palcu est arrividu, a mie an dadu sa médica iscéntzia: s'est chi potu nd'istrapo cun sa cura sa zente ch'est bintrende in sepoltura.

2. Màsala (43'')

Ilbono est una 'e sas residéntzias inube faghen sa gara ogn'annu e custa est una de sas ricurréntzias pro rèndere a Maria onore mannu. Gai su cumitadu sena ingannu dadu in su palcu at duas iscéntzias ma dognunu nde tenet una ebbia e s'iscéntzia mecànica est sa mia.

3. Sozu (1'27'')

Esaminende sa cosa a pienu in su tòrchiu ponzo sa memória. Sa prima chirca in sa zente est notória chi in s'erva at connotu su velenu: in meighina est restada s'istória da sos tempos d'Ippòcrate o Galenu ch'an pensadu a s'intera ratza umana ali muntenner sa carena sana.

4. Màsala (48'')

Po su tema abberimos su sipàriu,
s'esórdiu est andadu a chiusura.
Tue a sos males males rimédiu e cura
chircas ma unu mezu est netzessàriu:
una parte bi nd'at in su binàriu
e bi nd'at in su mare e in s'altura,
rodas chi giran e alas chi 'olan
e motores in sas undas chi colan.

5. Sozu (1'08'')

Fàghelu su viaggiu a s'infinitu
finas inue no b'at istradones.
Ma méigos antigos campiones
fin'in sa morte bintran in atritu:
agatamos sas mùmias d'Egitu
de sas reinas e de faraones.
S'iscéntzia nd'at dadu benes mannos
e las cunservat da chimbemiz'annos.

6. Màsala (47'')

Sos méigos illustres insignidos
sun distintos, sun bonos e famados:
cun su biancu càmicce bestidos
e dae me ja sun bene atrezados
prite si cheren sos males curados
deven esser sos mezos costruidos.
Si eo mezos no lis ponzo in manos
no torran mancu infirmos a sanos.

7. Sozu (1'03'')

Ma a unu male a ponner su sigillu
da chi tzeltos efetos an cumpresu:
su cane arrajoladu ti at ofesu,
cun sa puntura drommi trancuillu
prite Pasteur, su grande frantzesu,
de sa ràbbia agatat su bacillu
e bastat sa puntura de li apòrrere
e s'individu no lu lassat mòrrere.

8. Màsala (46'')

Ischimos chi sos méigos curantes
coment'a tie sos males los sanan
e si lo sanan che los allontanan
da totu sos terrenos abbitantes
ma, ammenta, sas chimas apianan,
bi cheret fortza e motores pesantes.
Dragan sos poltos, sos lagos e rios
ma cun s'impreu de sos mezos mios.

9. Sozu (56'')

In cussos montes s'impignu bi pones,
cun rocas mannas continu ti ataca.
Ma si su coro diventat mandrone
chi rallentat su sou tichi-taca
unu cungegnigheddu ponzo afaca
e torrat a normale ogni persone.
E gai mi nde 'anto e mi nde onoro
chi curreggio su bàtidu 'e su coro.

10. Màsala (44'')

Cando de ti 'antare as su disizu
invece 'e t'innaltzare ti arruinas
e bista atentu comente caminas,
fatigada no est unu passizu
.....sas menzus meighinas
nde 'ogat dae sas màchinas a pizu.
Riveri, Sotgiu, sa mecànica iscéntzia
ch'est sa ch'ap'eo in tema in possidéntzia.

11. Sozu (53'')

No mi comintzes noa una cantone
ca si no est diversa pantomina.
Totu s'impignu, Màrio, bi pone:
si tenes rodas, cun rodas camina
però a fagher una meighina
no est a cumbinare unu furgone.
Est una cosa pius delicada,
mezus de camminare in cuss'istrada.

12. Màsala (45'')

Eo naro sa cosa a pagu-pagu
ma no giuto annuadu su chelveddu
ca est lughente coment'un'isteddu,
s'oscuro no si ponet a istragu.
Chie t'at dadu fiala cun agu?
Chie t'at dadu fólfighe e bolteddu?
E su bìsturi ch'in manu as leadu
mi podes narrer chie ti l'at dadu?

13. Sozu (48'')

Mi paret unu fatu curiosu,
penso chi sos motores t'an istracu.
Mira, s'iscenziadu no est macu
ch'in dogni campu diventat famosu
e si t'an sos motores dadu atacu
ti dao chimbe dies de riposu.
E si non balit sa tua persone
ti che potu imbiare in pensione.

14. Màsala (44'')

Bellas cosas de nàrrere in s'Ozashtra,
a passu-passu in palcu prosighis.
Ma ch'adduras a segus, no lu sighis
ca s'iscéntzia mia no est fizastra:
..... in sa lastra
faghet s'esame de sos raggios ighis.
Fàghela tue sa radiografia
ma ammentati: sa màchina est sa mia.

15. Sozu (43'')

Sa màchina nd'est como in domo mia
ca so deo padronu 'e s'ispidale.
Tue as fatu sa màchina ebbia
e no cumprendes perunu segnale:
no est a fagher sa radiografia
est a cumprèndere inue est su male
chi an in sinu signore e signora
e si est malu a nde lu 'ogare fora.

16. Màsala (40'')

No penses ch'in su fogu mi ch'imbole
che a una distrata criatura.

Ma lassa a dainanti mi che cole
in logu giustu e no a rugadura:
smmentatinde, Ispadaru Ventura
ti dat sa màchina pro s'aerosole.
Si mancat cussa, Sotgiu no repichet
tand'est vanu sa cura chi s'aplichet.

17. Sozu (47'')

Ma est s'òpera mia netzessària
in chirurgia e in sa meighina.
Deo mesuro 'e sos primones s'ària
da chi difetat ómine e femina
e si s'ostruit una coronària
che l'aplico una mia valvolina
e tribagliat su coro in sensu sou
pompèndesi su samben dae nou.

18. Màsala (38'')

Improvisadu as una poesia
cun dogni versu bellu che aneddu.
Per'a tie ti mancat su faeddu,
lu sostitùis cun sa trachea mia:
l'aplicas a su surdu unu correddu
e funtzionat cun sa bateria.
E no est una tua meighina,
est cosa 'essida dae s'oficina.

19. Sozu (56'')

Tribaglia die e note in s'oficina
e-i sas tuas màchinas nd'esalta.
Ma da chi su pancréas faghet falta
viaggias tando a fortza de insulina
e su protone e-i sa brinerdina
li abbasciat sa pressione alta.
E gai si est curadu in dogni logu
su sàmbene no faghet brutu jogu.

20. Màsala (38'')

De custu no che naschet una briga,
che triunfat sa paghe santa e bella.
Ma impotentes a s'antiga
los bides a bacheddu e istampella
deo lis fato una carotzella,
alléviat su dolore e sa fadiga.
E gai fato, Sotgiu, a sas farrancas
ca sostitùo finas ambas ancas.

21. Sozu (

S'unu pitzinnu est caminende male
sos babbos e sas mammas ite isetan?
Su fenòmenu est tristu e naturale
.....
.....
.....
est un'arratza 'e rimédiu e cura
ch'aggiustat su guastu 'e sa natura.

22. Màsala (40'')

A mie paret sa manu divina
chi non an sos dutores che sos santos.
Bell'est a fagher sas rocas a cantos
e da poi a las cogher a calchina,
a trasformare su trigu in farina
de dare a mandigare a totucantos.
E no bi tenen palte sos dutores
ca b'est solu s'impreu 'e sos motores.

23. Sozu (54'')

Ma s'iscéntzia mia tenet fama,
parit guasi un'òpera divina
prite sa chirurgia e meighina
usadu as s'ingegnu e-i sa lama
ca Afrodite, un'invertidu, in Cina
at duos fizos de babbu e de mama.
At che babbu su fizu cuncepidu
poi l'at che femina partoridu.

24. Màsala (38'')

Ma no t'ammentas de unu bambinu
o, po esser pius sardu, unu piseddu?
Unu difetu aiat in su sinu
e decolladu est dae Casteddu
guasi in manu as leadu s'olteddu
e operadu che l'as in Torinu.
Ma a che lu trasportare de urgéntzia
b'at pensadu sa mecànica iscéntzia.

25. Sozu (52'')

Ma dutore bi fit custu e-i cuddu
in dogni logu bi est s'òpera mia:
so dogni die iscoprindè una via,
no ti ponet sa morte su cuguddu.
So tentende po sa talassemia
a fagher su trapiantu 'e su meuddu
e sun miraculosas cussas curas,
no at a morrer pius criaduras.

26. Màsala (38'')

Emmo, però de un'infermidade
as sempre de sanare un'isperàntzia:
in gioventude, betzesa e infàntzia
malàidos bi nd'at a dogni edade.
Ma deo abbreviadu ogni distàntzia
apo, Sotgiu, e-d-est comodidade
prite sa zente dae polu in polu,
ammenta, como s'ispostat a bolu.

27. Sozu (46'')

Ma deo so in mesu e in sos oros
istudiende sempre ogni persone.
Sos passos mios balin che tesoros
da chi ponzo sa mente in funtzione:
su trapiantu de coro e primone
e s'acopiamentu 'e duos coros.
Su moribbundu torrat in alenu
cun-d-unu coro sou e unu anzenu.

28. Màsala (43'')

Ma sa mia iscéntzia est ladina,
so pro l'àere in solte fortunadu
poite an sas trivellas apuntadu
e cun cussas ti bucan sa codina:
istraen grezu e benit trasformadu,
faghes da su petróliu binzina:
cun acrílicas e sintéticas matérias
no che sun de su coro in sas altérias.

29. Sozu (47'')

Tue de su chi faghes ti nde 'antas
e debes dimustrare cantu 'ales.
Ma deo a sas persones totucantas
alleviare lis poto sos males:
do meighina a totu sas piantas
e a sas ratzas de sos animales
ca bi so deo in prima riga, abbàida,
inue esistit sa parte malaida.

30. Màsala (37'')

No curas solu, ogni frase est pulida
chi mi pares su mastru 'e sa morale
cun-d-una 'oghe bella originale
chi ti d'at sa natura beneida.
Ma 'enit sa 'oghe tua naturale
barantamiza 'oltas ingrandida
e si ti manco deo ti arrendes
ca cantas bene però no t'intendes.

31. Sozu (51'')

Ma nara cantas boltas cantas male
e cantas meighinas as leadu :
de pastiglias ti ses apropiadu
chi b'as in domo unu mes'ispidale
e calchi 'olta a sa corda vocale
bi jughes unu pólipu atacadu.
E po cantare un'ateruna die
a nde l''ogare tocat tando a mie.

32. Màsala (32'')

Eo grascias a Deu ja so sanu
chi no connosco perunu dolore.
ma apo 'idu pius d'unu dutore
dae su primu a s'ùltimu pianu
cun su giornale e sa borseta in manu
pighend'in s'ispidale in ascensore.
E mi devet trattare de vostè
ca si li manco deo andat a pê.

33. Sozu (49'')

Ma in sa chirurgia 'e s'alta iscola
inue l'as sa gioja cumpresa:
da s'iscena e Don Gnocchi, ti consola,
Battistelli at sa lampadina atzesa
e-i sos ojos de Beppe Viola
como los giughet una nuoresa.
Apo curadu sa dilgrascia fea
dae su trapiantu 'e sa cornèa.

34. Màsala (43'')

Ma sa mecànica est emancipada,
pro m'isculture 'ene atentu ista.
Calchi odontoténnicu bi ada
chi postu in crisi at unu dentista
ca cun sa sua 'ona manu abbista
at, Sotgiu, dogni cosa manizada.
E sos chi andan a issu assiguran
ch'ispenden pagu e bene los curan.

35. Sozu (59'')

Incue est a bistare tropu atentu,
bi at calchi persona arruinada.
E s'odontiatria est meu inventu
si de nou sa 'uca 'ides mudada
e finas in-d-un'anca fraturada
ja che li ponzo un'isteca 'e argentu
ca fina incue oramai resesso,
lu fato camminare sentza gesso.

36. Màsala (36'')

Però in mesu de infermieris
ti tocat de passare s'esisténtzia.
Ma a ti nd'ammentas in tempos de eris
po traspoltare sa currispundéntzia
chi bi tenimos una diligéntzia
e-i como bi sun sos currieris.
An postu in abandonu su calesse
e sa posta arrivat pius in presse.

37. Sozu (53'')

Sa mecànica cantadila tota
poite est su tou ogni motore.
Ma sa patente dae innanti annota
chie t'at fatu su primu favore
e prima de 'olare unu pilota
lu devet visitare su dutore.
Prim''e partire adananti li colas:
ti naro a no bolare e non bi 'olas.

38. Màsala (39'')

Mi pares finas méigu ativu
chi non nde faghes de mala figura.
Ma inue su male est infetivu
cue bi cheret.un'emocoltura
po iscoprire in cussa criatura
s'esame negativu o positivu.
Bi pensas tue in s'ispidale ch'abbitas
ma sa màchina mia est sa ch'impitas.

39. Sozu (53'')

Ma morrer no mi fetas de paralis
a da chi ti ses lènde cussa via.
In sa emocoltura e ite 'alis,
a la cumprendes cussa maladia?
Deo no devo fagher sas analis
su ch'abbundat, su ch'est in carestia.
Cun pastiglias, supostas si no pungo
totu su chi li mancat bi lu aggiungo.

40. Màsala (36'')

Si mancat sa salute no est giogu,
menzus chi sian sos males curados
si sos males ti sunu derivados
o siat dae abba o dae fogu.
Ma s'in sos campusantos no bi at logu
sos cadàveres bides cungelados:
cosa chi faghen in su mundu intreu
e su cungeladore est su meu.

41. Sozu (49'')

Ma mi paret chi tue b'intres pagu
o no b'intras niente addiritura
o chilca a narrer faghinde figura
chi dae nou imprestadu mi at s'agu:
fat'eo a su defuntu una puntura
e-i su moltu no bogat fiagu.
Mancu lu toco e nemmancu l'abelzo,
lu fato resistire cantu chelzo.

42. Màsala (35'')

Eo no b'intro nudda cando as nadu,
ohi cantu mi pares atrividu
ca su chi ti bisonzat favoridu
ti l'ap'eo e l'apo fabbricadu:
si ti naschet un'essere incumpridu
amméntatì chi cheret incubbadu:
Tue l'ispedis a sa levatrice
ma chie dadu ti at s'incubbatrice?

43. Sozu (

So deo chi controllo....

.....

.....

.....su frenu andende male

.....sa cabbina

.....istas male in s'oficina

custu lu so pensende, ja bi creu

..... che deo.

44. Màsala (36'')

Ma s'iscéntzia mecànica in manos
ammentatinde ch'a mie l'an dada.

S'interessante est chi siemus sanos

però sa terra cheret iscassada:

da poi chi s'iscassat coltivada

e cun sos mezos in terra sovranos

ca no cherimos solu meighina,

tenimos puru bisonzu 'e farina.

45. Sozu (47'')

Càntati su trattore e-i s'alzola,

totu sos mezos chi tenes a pràtica.

S'ispatziale, una frebba antipàtica,

in terra italiana e sardignola:

un'annu nos arrivat s'asiàtica

un'annu nos arrivat s'ispagnola.

A mie bastat cun-d-unu vacinu

e-i sos males los bloco in caminu.

46. Màsala (35'')

Ma ammenta bene s'iscéntzia mia
chi bi est puru in sos ispidales.
Placas e gias calzas po cambales
apo fornidu a dogni farmacia
poi sa bicicleta cun pedales
a chie as ordinadu terapia.
mezos pagados, mezos gratuitos
sun totu da sa fàbrica 'essidos.

47. Sozu (49'')

S'acudo deo a sa peritonite
in pagas oras arrivat sa cura.
No faeddamos de s'apendicite:
como de sue est una crastadura
e no s'agatat una criadura
chi no siat afetu 'e tonsillite.
E deo si no sanat in pag'ora
leo sa pintza e nde la 'ogo a fora.

48. Màsala (38'')

Chi no isbaglies e no ti confundas
ja chi t'apretzan mannos e minores.
In sas intragnas de marinas profundas
totu sos mios sunu sos motores
e apo dadu sos dissaladores
chi sun addatos po s'abba 'e sas undas.
E sa chi fit salida e fit metzana
como la bufan che abba 'e funtana.

49. Sozu (57'')

Permiti cossizare si ti potò
finas da chi l'as s'abba dessalada
o ti l'as in sa diga impresonada
cussas impuridades bi las noto.
Ammenta s'abba de ogni acuedoto
ch'est dae su dutore analizada
ca solu isse de ischire est àbbile
s'est abba mala o s'est abba potàbbile.

50. Màsala (37'')

Si sas òperas tuas sunu bellas
mi' chi mancu sas mias sunu umiles
poite como in épocas civiles
an raggiuntu su regnu 'e sas istellas.
Cun sos missìles e sas navicellas
nd'apo fato de vàrios istiles
pro cuddos chi bi si sun lanciados
ma 'ois no bi sezis arrivados.

51. Sozu (51'')

Si che cheres bintrare in cussu ballu
esaminare totu devo apena
po poder fagher sa gita serena
no b'apat morbo neru o morbo giallu.
Si torrat in s'iscàtula 'e cristallu
tando li fato fagher barantena
e bi lu naro da chi arrivat s'ora:
"Como ses sanu e bessitinde fora".

52. Màsala (

Como sanu est torradu in bonumore
e l'as sa maladia ismentigada.

Per'a s'umanidade cantu b'ada

unu mecànicu che benefatore

prite sa prima màchina a vapore

est infata l'ada:

cudda chi dae Nàpoli est partida

e ch'est finas a portu.....

TEMA II: **DIMÓNIU - GESU CRISTU**

1. Sozu (1'23'')

Prima de l'aer in palcu cantadu
mai s'ischit su tema si est idóniu,
diversu dae Càiu a Sempróniu
sigundu coment'est interpretadu.
Como s'àteru tema mi ana dadu
e a mie mi tocat su dimóniu:
est complicadu su cómpitu meu
totu da m'esser ribbelladu a Deu.

2. Màsala (50'')

Prima chi sa passéntzia agguantat
eo penso ch'adduret in s'isetu
custu gentile pópulu diletu
chi po festare a Maria si 'antat.
E gai Sotgiu su diàulu cantat
sempre cun su matessi dialetu
tiradu in sorte e in parte intendo
e deo a Gesu Cristu mi difendo.

3. Sozu (1'15'')

Ognunu est de idea diferente,
sa parte mia non nos dat recreu.
Umiliare no mi chelzo a Deu,
so diventadu tropu prepotente:
apo criadu in su chelu peleu,
in su giardinu in forma 'e serpente
ap'ingannadu sa prima signora:
s'apo bisonzu fato dannu ancora.

4. Màsala (45'')

Tando si mi faeddas de ingannos
ja contas tue aversàriu meu
ca sa naschida 'e su fizu 'e Deu
in custa terra minores e mannos
in totucantu s'universu intreu
fin ispetende batomiza 'e annos
finas a cando su Messia est naschìdu
ca dogni pecadore at redimidu.

5. Sozu (1'04'')

Nachi as fatu 'e sas ànimas riscatu
ma deo ti cunfesso: no be-i creo.
Sa lughe dae palas no ti leo
mancari dannu meda no apas fatu
ca a Giuda, a Càifas e Pilatu
los apo cossizados totu deo.
Finas sa morte t'at fatu a timire,
cossizados los apo a ti 'ochire.

6. Màsala (49'')

Ma deo so funtana 'e perdonu,
capolavoro sapiente e giustu
e no b'at fintzione in totu custu
jamadu anzone 'e Deu su pius bonu.
Cando batòrdigh'annos Augustu
sétzidu bene bi fit in su tronu
amméntati chi so nàschidu deo
e-i sas legges suas las ap'eo.

7. Sozu (1'01'')

Suta su mare e in subra 'e sa nue
bi est su meu impètu colossale.
M'as a dare sa forma de animale
ma no so caminende a pesarue
poite a cando ses nàschidu tue
deo nde fia istracu 'e fagher male.
E-i como in su clima pius bellu
totu su mundu li ponzo in buldellu.

8. Màsala (44'')

No naro chi dormire mi cheria
ma tand'at a tocàre chi m'ischide.
Mi' chi eo so sìmbulu 'e sa fide
e su signale 'e sa pregadoria,
nàschidu da sas intragnas de Maria,
pensamentu 'e s'istirpe 'e Davide.
È tue nara fizu 'e chie sese
inue ses naschìdu, in cale mese?

9. Sozu (59'')

Tue ses fizu de Nostra Signora,
gai de issa a fiancu ti pone
ma deo so naschìdu prima ancora
de anghélos in mesu su masone:
ca mi ch'an da su chelu postu fora
so passadu a s'oposizione
e la punto sa coa, unguas e dentes
e ti che leo totu sos clientes.

10. Màsala (45'')

No t'est andadu bene su disignu
a da chi naras chi sas dentes ficas.
Sas peràulas mias sunu ricas,
s'iden a mie si faghen su signu
tue ses un'ispiritu malignu
e cando t'iden ti faghen sas ficas
ca bona parte ja timen s'interru
timinde cussas penas de s'inferru.

11. Sozu (50'')

Tzertu non so in cheja bene acoltu
e tue a mie no ti mi avvicinas.
Cun sas ideas mias malandrinas
ap'in chelu una càusa risoltu
e puru babbu tou non mi at moltu
chi m'at lassadu a seminare ispinas.
E dae m'esser ribbelladu a Deu
como tenzo unu regnu a contu meu.

12. Màsala (42'')

E tando in s'inferru ti chi 'etas
inube sun sas ànimas dannadas.
E in su regnu meu animas netas
bi tenzo in paradisu e premiadas
e sas frases de totu sos profetas,
s'ammentas bene, si sun azeradas
proite in terra 'e sa nàschida mia
nd'at faeddadu finas Malachia.

13. Sozu (58'')

Ma de sas profetzias chi an iscritu
cust'argumentu a términe lu jughe.
Ses bénnidu po generare lughe,
illuminadu no as dogni abbitu
ca ses nàschidu e ses mortu in sa rughe
però a mie no m'as isconfitu.
Antzis mi parit chi a sa tua morte
deo so diventadu pius forte.

14. Màsala (44'')

A mi lassas istare sa matana?
Deo so unu 'e sos miraculosos
chi apo nadu in sas notzes de Cana
a trasformare s'abba a sos isposos,
so su ch'apo sanadu sos lebbrosos,
apo curadu sa samaritana
ca sos prodigios mios meda sunu:
tue invece non nd'as fatu manc'unu.

15. Sozu (56'')

Guido dae sa culla a s'interru
totu sos chi malìzia an bastante
e no penses chi deo mi nd'ispante
si da ch''iden a mie tocan ferru.
Ti debes ammentare, finas Dante
prima 'e totu at cantadu s'inferru.
Su chelu mancu in poesia rendet,
chie lu legget mai lu cumprendet.

16. Màsala (41'')

Ma cussu est un'àteru autore
chi at iscritu e tue as fatu dannos.
A disputare cun-d-unu dutore
a mie m'ana 'idu a dóigh'annos:
mancari essera in edade minore
deo mi so distintu cun sos mannos
e dotadu de limpida favella
mancari ancora in s'edade novella.

17. Sozu (50'')

Ca fis fizu de su deo de sos deos
as faeddadu 'ene in cuss'edade.
Ma deo tenz'orgogliu e vanidade,
in custu mundu sèmeno peleos:
incolco a totu sa malvagidade
a no crêre apo nadu a sos ateos.
E da chi lis incolco ideas malas
tando a tie ti giran sas palas.

18. Màsala (45'')

Deo ap''atidu sa paghe perfeta
dae su chelu a s'universu unidu,
fizu 'e mama de pecados neta
e deo so naschidu beneidu
e sa note ch'in terra so naschidu
s''idet in s'infinitu una cometa.
Ma tue a sa terra das iscuru
..... pius puru.

19. Sozu (48'')

Como de un'istella ti das lodes
pensende chi a mie mi annientes.
Naschinde de Sant'Anna che nebode
pagos pastores as bidu presentes:
deo fia tramende cun Èrode
fagher s'istrage de sos innotzentes.
E tando abbandonadu l'as su situ,
ti ch'apo fato fuire in Egitu.

20. Màsala (43'')

Lass'istare sa parte chi est sa mia,
Sotgiu, segundu de sa trinidadade.
A mie as bidu in su Tiberiàde,
apo jamadu a Pedru cun Andria,
a su mannu cun su minore frade
cando pischende fin in cumpagnia.
E lis apo insignadu a preigare
a cunvertire e a batizare.

21. Sozu (58'')

Ma una trinidadade 'enit connotu
notan sos capos de tantos partidos
ca contr'a tie si sun acanidos
e cantos santuàrios an cotu ?
Sos apòstulos non sun resessidos
in su mundu a los cumbincher totu.
Mancari apan bussadu in dogni janna
deo tenzo sa parte pius manna.

22. Màsala (42'')

Deo apo fatu su capolavoro,
mastru supremu 'e sa creazione
ch'apo connotu morte e passione
poi chi trapassadu mi an su coro.
Ma prima regaladu mi an s'anzone,
sa mirra cun s'incensu e-i s'oro.
E so como in chelu divinu giuìghe,
no che a tie nieddu che pighe.

23. Sozu (1'03'')

Fiza tua no est sa ratza mora
si apo interpretadu sa idea
ca sa carena mia nachì est fea
ma in sa lota mi bi frimmo ancora
e virtuosu no b'at a e ne dea
chi no lu tento finas a s'ùltim'ora.
E l'innièddigo sas carres biancas
da chi ti che los leo dae francas.

24. Màsala (41'')

Tra nois duos no b'at assimizu,
tue infernale e deo sovranu.
ca est bellas'iscena 'e su Gioldanu:
una columba bianca che lizu
abbasciat e m'at dadu su batizu
Juanne, ube m'at fatu cristianu.
Dognunu m'at adoradu e pregadu
a manos giuntas e imbenujadu.

25. Sozu (59'')

Prite nos naras: sa legge rinnova?
S'a toltu no cumprendes, tando adiu.
Chi no ses forte mi ses dende prova
cun su batìjimu 'e su nou criu
prite sos tistimonzos de Geòva
su batijende de nou in su riu.
Dia cherrer chi m'ispieghes custu:
e cal'est su batizu pius giustu?

26. Màsala (41'')

Cando mi ch'essis de cussa manera
a ischis ite parrer ti cheria ?
Ses nieddu e unu pagu in avaria
deo lìmpidu e biancu che chera,
poi ammentatinde chi cust'era
est paltida da sa naschida mia.
De cust'era un'istória l'an fata
e bistada fatìdica est sa data.

27. Sozu (51'')

Ma la crês una gioia cumpleta
da chi ti 'antas che fizu 'e Maria?
Ses cunvertidu in ossos e in peta
po 'ider in sa rughe s'agonia:
deo no la raggiungo cussa meta,
so restadu seguru su chi fia.
No poden un'ispiritu aggredire,
no est fàcile meda a mi 'ochire.

Nel file audio quest'ultima ottava viene ripetuta (27'18'')

28. Màsala (43'')

Ajò, in aterue ti trasferi
cando a su benefagher ses contràriu.
Deo passentziosu e volenterì
so su ch'ap'afrontadu su calvàriu
nominéndemi a Pedru pro vicàriu
e l'apo fato 'e su chelu jaeri.
Tue in s'inferru tenes solu tanas
cun coloras, cun pìberas e ranas.

29. Sozu (48'')

Como ti 'antas chi a proa manna
tenes a Pedru in su celeste imperu.
S'est a fagher guardianu abberu
parit po Santu Pedru una cundanna:
deo 'e s'inferru a tentare sa janna
ammentatinde apo postu a Cerberu.
Su chi su santu faghet iguddane
in custu regnu lu faghet su cane.

30. Màsala (42'')

E tando a s'inferru ti l'avias
e in su regnu tou ti che cuas
mannas sas diferéntzias sun duas
tra sas ànimas malas cun sas pias
e a da chi sas borgias sun sas tuas
amméntati sas iscalas sun sas mias.
Sas borgias infernales sun mischinas,
sas iscalas de chelu sun divinas.

31. Sozu (43'')

(Ma) a bandare a s'inferru est in falada,
sa zente suerende no l'an bida:
una janna potente inie b'ada
chi su cane ti faghet de guida
e a sos bios vietat s'intrada
e a sos moltos vietat s'essida.
Sos chi nd''enin e ponen mente a mie
tando deven restare sempre inie.

32. Màsala (48'')

Ses unu falsu, unu fintu, unu reu
pienu de difetos e manias
ca so deo chi abbeltu apo sa vias
pro che pigare a s'altu empireu
e-i su pane sun sas carres mias
e-i su 'inu est su sàmbene meu
pro cuddos ch'in s'altare ponen pèse
e bi so deo e tue no bi sese.

33. Sozu (47'')

In s'inferru b'agatan ogni acisu
si divértini mascios e feminas
ca lis do deo 'e cossizo s'avisu,
s'impossessen de soddos e sisinas.
Ma sas iscalas de su paradisu
nachi sunu cobertas de ispinas:
si sas ispinas inie bi sunu
sas puntas no piaghen a nisciunu.

34. Màsala (43'')

Ma si Cainu moltu at a Abele
sa culpa tenes tue che ribbellu.
Invece osselva it'annùntziu bellu
ch''atit dae su chelu Gabriele:
devia nascher deo su novellu,
frutu 'e Maria, jamadu Emanuele
chi cheret narrer su libberadore
po s'umanu terrenu e peccadore.

35. Sozu (46'')

Deo tenzo un'ispétzia 'e governu
chi naro a totu a si divertire:
peso chi 'e molte no cherzan ischire
ca sa vida est s'insoro ùnicu pernu.
Tue a sa zente naras a sufrire
po godere su tou regnu eternu:
eco s'impressione chi mi faghet,
ch'a sufrire a sa zente no piaghet.

36. Màsala (40'')

Ma s'apodebbelladu ogni pecadu
tando alleviada est una pena.
Ammentatinde chi multiplicadu
pisches e pane in s'ùltima chena
poi so mortu e resuscitadu
e apalzo po prim'a Madalena.
Ma tue sempre in s'inferru ch'abbitas,
mai no moris e ne resuscitas.

37. Sozu (50'')

Ma una cosa fàghemi a ischire,
est in chelveddos su dùbbiu arreu.
S'est cundennadu s'ispìritu meu
intro su fogu a che poder perire
e gai tue e babbu tou Deu
poite a mie lassades bessire
a creare sas penas, dannu e ois?
Tand'est signu chi 'alzo cant''e bois.

38. Màsala (41'')

Ma frutu 'e unu sinu beneitu
so deo primu e tue sigundu.
Gai Erode bandidu at s'editu
pro bochire sos mascios in su mundu:
mi che setzen in-d-unu pei-tundu
e rifugiu mi chilcan in s'Egitu
poite fia pitzinnu 'e salvare
sìmbulu 'e dogni cheja e dogni altare.

39. Sozu (47'')

Tue ses su pastore 'e sos anzones,
m'a boltas restas cun sa lana in manu.
De sos males de su gènere umanu
connosco deo sas inventziones:
detad'apu sas persecutziones
dae Nerone a Diocletzianu
totu po fàghere a tie unu toltu
e vinti milliones nde ana moltu.

40. Màsala (42'')

Sa tua est dogni persecutzione
dae Nerone a Diocletzianu.
Ma su treghentos e tréighi in Milanu
in favore 'e sa mia religione
Costantinu imperadore romanu
at bandidu un'editu cun rejone.
E l'at cuncessu a s'universu intreu
e propagadu at in favore meu.

41. Sozu (49'')

Pensende a Costantinu tenes toltu
si no bi jughes in ojos su velu.
De ti lu ispiegare tenzo anelu
coment'in bratzos tuos l'as acoltu:
ammentatinde canta zente at moltu,
cando mai l'atzetas in su chelu?
Si tzelta zente bi atzetas inie
tando b'as malos comente a mie.

42. Màsala (41'')

A mi los lassas istare sos chelos
ca semus deo bellu e tue feu
ube b'at cherubinos in corteu
e no bi mancat santos e anghélos.
Propagadu an sos bator evangelos
Marcu, Juanne cun Luca e Mateu
chi sun restados in terra famados
però los apo deo illuminados.

43. Sozu (1'01'')

Fininde naro a sa zente in piata
chi li passen s'ispugna a custa cosa.
Mi paret un'iscena terrorosa:
si calchi otavighedda l'apo fata
fio cantende una parte ingrata
contr'a s'idea mia religiosa.
Ma sos dimónios dae dogni logu
ch'essan a fora istitonende fogu.

44. Màsala (40'')

As finidu su tema, intendo a tie:
tocat chi deo puru l'abbandone.
Dae me a un'ala ti che pone
ca semus tue note e deo die:
deo biancu e candidu che nie
tue nieddu che-i su calvone
chi parimos s'astore e sa columba
mabi sun in s'oltretumba.

DISPEDIDA

Màsala (2'23'')

Fiza, isposa e mama nazarena
padrona 'e chelu, signora e reina,
coment'a tie un'àtera femina
no s'at bidu divina e ne terrena
ca tue fis terrena e ses divina,
de virtudes e gràtzias piena,
gloria, onore e bantu 'e Palestina
cun davidicu sambène in dogni vena.
Jamada puru 'e Géricu sa rosa,
ses verginella de sa terra santa:
beneighe in Ilbono totacanta
abbitantes, abbìtos, dogni cosa
e procura ogni annada bundansciosa
pro laore, pro elva e pro pianta.
Però su donu tou pius mannu
dalu a su cumitadu dirigente
chi rinnovadu ti an sa festa ocannu :
sempre los apas in coro e in mente,
immunes dae pena e dae dannu
lassa a chent'annos dognunu vivente.
Ringràtzio po m'aer ospitadu
e sia perdonadu e cumpatidu
pro sos errores ch'apo cumitidu
sas pagas oras chi che so istadu.
Maria bos proteggiat a ambas manos
e bonanote e a nos bier sanos.

DOMUS DE JANAS
CARRELA MONTE BIANCO, 54
SU PLANU - SELARGIUS
www.domusdejanaseditore.com